

PLAN I PROGRAM RADA KRUG 99 U 2019. GODINI

Uvod

Krug 99 je osnovan 1993. god., kao oblik intelektualnog otpora agresiji na BiH. Osnovna misija djelovanja Kruga 99 je rad na unapređenju kulture dijaloga između aktera javnosti iz akademske, kulturne, ekonomske i političke sfere uticaja, na unapređivanju mira, organizovanja Bosne i Hercegovine kao demokratske pravne države svih njenih naroda i građana i demokratskog uspostavljanja i organizovanja civilnog društva.

Krug 99 blisko surađuje sa Srpskim građanskim vijećem – SGV, Hrvatskim narodnim vijećem – HNV i Vijećem kongresa bošnjačkih intelektualaca - VKBI. Za svoje djelovanje Krug 99 je primio više međunarodnih nagrada i priznanja, među kojima se posebno ističu: Nagrada FONDACIJE OLOF PALME (Štokholm), Nagrada FONDACIJE KRALJA BOUDOUINA (Brisel) i Nagrada FONDACIJE ALBERTO MORAVIA (Rim).

Ciljevi projekta

Obnova vrijednosti BH kulture zajedničkog života, dijaloga između ključnih aktera javnosti iz teorijske i praktične sfere društvenog djelovanja, afirmacija subjektiviteta i suvereniteta države BiH, povratak povjerenja i pomirenja, jačanja BH kulturnog identiteta osnovni su ciljevi projekta. Oni trebaju biti afirmisani putem upornog i produktivnog kritičkog dijaloga, te u funkciji ranog upozorenja na pojave i procese koji su u suprotnosti sa navedenim ciljevima. Nedavno formiranje i rad Mostarskog Kruga, Građanske inicijative Bihać na principima sarajevskog Kruga 99 daje pravo na poticanje razvoja ovog autentičnog i samoniklog oblika rada civilnog društva.

Mentalne i kulturološke zatvorenosti i socijalne distance kako pojedinih socijalnih grupa i pojedinaca, tako i lokalnih sredina jednih prema drugima, te njih u cjelosti prema „centru“, Glavnom gradu, nerijetko poprimaju i suprostavljene, konfliktne političke oblike fenomenološki prepoznatljive na relaciji važniji – manje važan, selo – grad, centar i provincija. One su prisutne u većoj ili manjoj mjeri u svakoj društvenoj zajednici, a uobičajeno i uspješno se rješavaju demokratskim mehanizmima, politikom otvorenosti i razvijanjem kulture dijaloga.

Nakon posljednjeg rata u BiH, uobičajen stepen podozrenja, suprostavljenosti i konfliktnosti, dodatno je produbljen sve većim etno-teritorijalnim, nasilnim etničkim grupisanjem, te političkom (zlo)upotrebom etno-religijske identifikacije do neslučenih razmjera.

Osim u uslovima masovnih prirodnih katastrofa kada dolazi do humane, ljudske solidarnosti, i kada se u prvi plan ističe tradicija života u različitosti i toleranciji kao čvrst oslonac sigurnosti za sve, u druga, „politička“ vremena pogotovo, etnička distanca postaje sve veća, pa i konfliktna. Međutim, i unutar etničkih, teritorijalno omeđenih grupa, stalne su napetosti pa i sukobi kako na tradicionalnim, gore pomenutim osnovama, tako i na pitanjima razvijenosti/nerazvijenosti,

zastupljenosti/nezastupljenosti u centrima moći i odlučivanja, preferiranja ili zapostavljenosti pojedinih regija ili gradova, itd.

Metodologija rada

Ulazeći u 26. godinu kontinuiranog rada, Krug 99 nastavlja sa etabliраним načinom rada održavanja javnih interdisciplinarnih sesija o aktuelnim temama države i društva, kulture, nauke i obrazovanja na redovnim nedjeljnim zasjedanjima (godišnje oko 35 do 40 sesija), kao i na druge načine. Uvodničari na sesijama su osobe iz akademske zajednice, politike, kulture, diplomacije i ekonomije kako iz BiH tako i inostranstva. Sesije su izrazito prisutne u javnosti zahvaljujući velikoj medijskoj pažnji.

Redovne sedmične sesije u dosadašnjem radu pokazale su se kao prostor djelovanja i ozbiljnog utjecaja na javno mnijenje. Princip aktuelnosti je osnovni postulat u radu, stoga se prate i vrednuju aktuelna društvena, politička, ekonomska, kulturna i druga pitanja, od suštinskog značaja za cjelokupnu društvenu zajednicu.

Zbog toga značajan segment metoda rada jeste saradnja s medijima. Svake sedmice, rad KRUGA 99 redovito prate radio, televizijski, printani i novi mediji.

Na redovnim sesijama KRUGA 99 svake sedmice govore od jednog do 5 uvodničara te moderator iz same organizacije. Učesnici sesija su i svi članovi KRUGA 99, kao i gosti koji prisustvuju, te učestvuju u diskusijama dijaloškog tipa koje slijede nakon izlaganja uvodničara. Svake sedmice, o temi se vodi interdisciplinarna rasprava u kojoj u prosijeku direktno učestvuje petnaest intelektualaca.

Ključna intencija u ovoj godini je veće otvaranje Kruga 99 prema akterima izvan Sarajeva i regije zapadnog Balkana, što je uglavnom bilo limitirano finansijskim mogućnostima. Ovaj nestranački oblik okupljanja intelektualaca i njihovog javnog, kontinuiranog djelovanja u proteklih skoro 26 godina, potvrdio se kao nezamjenljiv način suočavanja teorije i prakse, normi i stvarnosti, te uticaja na javni prostor društvenog djelovanja.

Upravo zbog toga Krug 99 kao organizacija sa dugom tradicijom i multietničkog prepoznatljivog sastava mogao bi da unaprijedi svoj vlastiti rad „izlaskom“ iz sarajevskih geografskih okvira u različite sredine u BiH, s jedne, i sa druge strane, „otvarajući“ Sarajevo za aktivan uticaj drugih, lokalnih sredina na „sarajevsko elitno mišljenje“ o ključnim pitanjima države i društva. Time bi Krug 99 načinio značajan pomak u ostvarivanju svoje osnovne misije u afirmaciji tradicije života u različitosti i međusobnom razumijevanju ljudi i naroda u BiH, a predstavnicima lokalnih sredina u BiH izlazak iz stanja zatvorenosti i etnofobija.

Metodom dijaloga sa akterima u regiji o temama suočavanja sa prošlošću, obnove intelektualnog dijaloga i kulturnih veza mogao bi biti značajan faktor građenja povjerenja i prevazilaženju zatvorenosti, izolovanosti i konfliktnosti. Uz odgovarajuće materijalne pretpostavke Krug 99 bi

mogao dati važan doprinos otvaranju različitih sredina u BiH i regiji, prije svega metodom dijaloga, pa i prema Sarajevu kao Glavnom gradu.

Pored redovnih sesija Krug 99 može organizovati i Think-Tank naučne konferencije, akademije i omaže, kao i javne skupove sa masovnim učešćem u saradnji sa drugim organizacijama (Narodni skup na Bobovcu povodom Dana državnosti BiH), te brifinge – direktne dijaloge sa akterima kreiranja značajnih inicijativa.

I u 2019. godini biće održano od 35 do 40 redovnih nedjeljnih sesija iz spektra kulture dijaloga i intelektualnog angažmana, bar jedan think-tank naučni skup, jedan masovni skup na Bobovcu, više omaža sa povodom sjećanja na istaknute ličnosti kulture i umjetnosti, te aktivnosti članova u promociji knjiga, izložbi i drugih kulturnih događaja.

Korisnička grupa i broj korisnika, broj članstva

Zbog izrazite medijske i uopšte prisutnosti u javnom prostoru, moglo bi se argumentovano istaći da je ciljana korisnička grupa javnost u BiH, akteri akademskog, političkog, kulturnog i privrednog života u BiH. Tretiranjem aktuelnih društvenih pitanja, Krug 99 se objektivno obraća cjelokupnoj javnosti u BiH, a i šire, uključujući i diplomatsku zajednicu.

U užem smislu na godišnjem nivou u funkciji uvodničara učestvuje oko 120 relevantnih uvodničara za pojedine oblasti nauke, kulture, privrede i politike iz i izvan BiH, sa oko 570 učesnika u dijalogu. Masovni skup na Bobovcu okuplja sve veći broj učesnika (prošle godine oko 1.000 sa 150 aktera u realizaciji događaja). Takođe, oko 50 članova Kruga učestvuje u aktivnom angažmanu na promocijama knjiga, akademijama i omažima, naučnim, kulturnim i drugim skupovima.

U Krugu 99 danas djeluju eminentne ličnosti naučnog, kulturnog, umjetničkog i javnog života, među kojima ima članova Akademije nauka BiH, pisaca, novinara, slikara, filmskih reditelja, ljekara, ekonomista, pravnika, pozorišnih umjetnika, teologa, muzičara, humanista i drugih ličnosti. U redovnoj aktivnosti učestvuje oko 70 aktivnih članova i isto toliko povremeno u funkciji počasnih članova (članovi iz inostranstva, izvan Sarajeva ili povremenog učešća zbog teškoća zdravstvenim stanjem). Obnavljanje članstva mora biti jedan od prioriteta zadatka.

Ocjena krajnjih rezultata i očekivani rezultate realizacije projekta

Činjenica je da je Krug 99, postao prepoznatljiva institucija civilnog društva u javnom prostoru Bosne i Hercegovine, sa autentičnim pristupom i dosljednošću na afirmaciji kulture dijaloga i intelektualnog angažmana o bitnim pitanjima države i društva. Teme, inicijative, precizan kategorijalni aparat, afirmacija vrijednosti zajedničkog života se neosporno multipliciraju u javnom prostoru. Doprinosi očuvanju multietničkog karaktera društva, povezivanja aktera dijaloga u BH i regionalnom prostoru, poticanje javnog angažmana intelektualca i drugih aktera javnosti su neosporni.

Prevazilaženje relativne izoliranosti Sarajeva prema drugim sredinama i njih prema Sarajevu moguće je u većoj mjeri ostvarivati sa povećanjem najosnovnijih materijalnih pretpostavki za taj segment u realizaciji projekta.